

廣東名勝志

八之十
雷州府 廉州府
瓊州府
五冊



漢書門	二	三	六	八
類	一	三	六	八
號	九	三	八	七
函	三	八	七	八
架	九	三	八	七
冊	九	三	八	七

內閣文庫	漢書	二	三	六	八
番號	九	三	六	八	
冊數	八	三	六	八	
函號	九	三	六	八	
架	八	三	六	八	
冊	九	三	六	八	

內閣文庫	番號	漢	2368
冊數	93	(70)
函號	291		35

明名勝志七十



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



糊などで貼り付けられている部分がめくれない箇所あり



廣東名勝志卷之八


閩中曹學佺能始撰



雷州府

在省城南一千里

領縣三



宋圖經云周惠王命楚子熊惲鎮南海至此建樓以表其界登覽四方豁然洞達因名楚豁樓至今卓處郡城之上漢元鼎四年置合浦郡統縣六其一為徐聞即今治也元和志云梁武帝分合浦郡置合州大同末以合肥為合州此為南合州治在特侶塘唐貞觀八年改名雷州投荒錄以其雷聲近在簷宇間也又云陰晦之夕郡田必有開墾之

跡土人謂之雷耕國史補云春夏日日有雷至秋則伏地中其形如虺人取食之謂之雷公按志雷公山在郡西北四十五里高八丈盤旋五十里唐郎士元送林材配雷州昨日三峰尉今朝萬里人平生任孤直豈是不妨身海霧多爲瘴山雷乍作鄰遙憐北戶月與子獨相親○志云四德祠在城內雲衢坊祀郡守何庾戴之邵薛直夫孟安仁也四賢皆有功德于民故祀之而後附以陳大震虞應龍烏古孫澤呂琬郭思誠賈煥等今併廢○十賢堂在西湖之上宋咸淳九年郡守虞應龍建文

天祥記畧云志稱寇萊公準以司戶至丁晉公謂以崖州司戶至學士蘇軾正字任伯雨以渡海至門下侍郎蘇轍以散官至秦觀以蘇門下至樞密王巖叟雖未嘗至而追授別駕猶之至也未幾章惇亦至其後丞相李綱趙鼎叅政李光編修胡銓皆由是之瓊之萬之儋之崖邪正勝負世道與之爲軒輊雷視中州僻遠且小而世道之會乃于是而可觀矣虞侯應龍來知雷州考圖謀訪故老顧瞻山川怒如有懷乃黜丁氏章氏自萊公以至澹菴凡十賢爲祠于西湖之上使海邦興起前聞知

所勸云余不敏叙其凡復為迎送神祠而系以詩
曰颶風起兮雲黃萬里兮故鄉桃菊兮不祥何懷
乎斯宇兮惟獨此眾芳五岳為質兮三辰為光保
有國兮萬年其昌

海康縣 附郭

元和郡縣志云隋開皇十八年析徐聞縣地置隋
康縣十年改為海康余按隋志合浦郡下有海康
與隋康自是二縣不應合為一也唐志云徐聞本
隋康貞觀二年更名徐聞則隋康乃徐聞非海康
矣宋初以遂溪徐聞二縣併入南渡後復析為三

○南樓即郡城南門譙樓文宋瑞記畧曰並海為
州者皆有颶風而雷為甚二面際海當風之衝太
史虞應龍來為州是歲咸淳十年夜半颶風作厥
明視之譙壓隍壞方風之來也其暈如虹有蜃如
樓臺及其歛烈較轆旬哮撞粹聲氣不可名狀侯
乃伐巨材鳩工並興設為巍峩下臨鯨波云云○
城南有蘇公樓宋蘇黃門以論熙豐邪說安置雷
州章惇下令流人不許占官舍郡人吳國鑑造屋
于此以處子由惇又以為彊奪民居然賴有儼券
而止其兄子瞻亦謫儋耳過之同處月餘其後郡

守毛當時卽其地建樓焉子由寓居雜詠手植天
隨菊晨添苜蓿盤叢長令夏苦花晚怯春寒素食
舊無愧長齋今未闌殷勤拾燈蕊眼暗讀書難又
鄰家三畝竹瀟散倚東牆誰謂非吾有時能爲我
涼雪深間毀折風作任披狂事過還依舊相看意
愈長長公和云堂前種山丹錯落瑪瑙盤堂後種
秋菊碎金收辟寒草木如有情慰此芳歲闌幽人
正獨樂不知行路難又幽居有古意義井分西牆
誰言三伏熱止須一杯涼先生坐忍渴羣鷺自徂
狂衆散還獨酌逡巡味尤長○圖經云擎雷山在

城南八里擎雷之水出焉水有三一出銅鼓村一
出鷓鴣坡一出徐聞縣界三水合流環繞縣治如
帶與海潮接相聞昔被雷震成水故名○夢溪筆
談云世人有得雷斧雷楔者皆于震雷之下云雷
神所墜元豐二年予居隨州夏水雷震一木析其
下得楔信如所傳嶺表異錄云雷州西南八里有
雷公廟每歲土人造雷鼓雷車具酒殺設奠甚謹
最忌彘雞二肉犯者立致霹靂舊志州民有陳姓
者出獵得巨卵歸置庭中忽一日雷震乃析得一
男子左右手有文曰雷長而涉獵書傳辟秀才中

廣東各屬志 卷之八 四
第仕爲本州刺史有善政梁武帝賜璽書褒獎旣
沒有靈異鄉人呼雷種立廟祀之○宋李永年雷
廟記云舊址在州西南山岡梁開平中廟隨州遷
又二年一夕颶風暴作廟失二樑所在尋訪不獲
乃徙于英榜山之石神廟西卽其地建廟與石神
相並○按英榜山在城西八里舊有石神五代梁
旣遷雷廟于其座西僞漢時復欲遷雷神正殿居
東而遷石座于西使人昇石不動遂鑿其根愈掘
愈深乃知其神不許遷動也今雷廟前百步小阜
上有石龜二座係古墓蓋其一爲雷震裂草木生

其間弘治以來漸合僅有跡如瘡癥○英靈岡在
城北五里與擎雷山相對狀如屏几舊名烏卵山
相傳陳大建間雷出于此英靈顯異乃更今名或
云雷種陳氏世居于此宋寇平仲造之有留題英
靈陳司馬宅卽其後也詩云公餘策馬到英靈幸
有官僚伴使星人物熙熙風景盛好將佳會入丹
青○東洋海在縣東十里極目無際南通瓊崖西
通對樂楊梅二珠池東北通閩廣海中有思靈島
舊志每年九月黃魚化鳩出水集巖樹人網之輒
得又有羊肝魚形斑頭大尾有星老則化爲蛇夷

堅志趙鼎貶珠崖桂帥張淵道遣使致饋自雷州
浮海風力甚勁顧見波濤中紅旗相逐而下使者
疑爲海寇舟人握手令勿語急入舟被髮持刃出
逢背立割其股血滴水中凡經二時乃相呼曰更
生因言此巨鱷也紅旗者鱷鬚耳使與吾舟相值
數里之間一展轉舟則淪溺是時舟南去鱷北上
相望兩時彼此各行數百里計其身當千里有餘
蘇子瞻渡海詩參橫斗柄欲三更苦雨終風也解
晴雲散月明誰點綴天容海色本澄清空餘曾叟
乘槎意粗識軒轅奏樂聲九死南康吾不恨茲遊

竒絕冠平生○漉洲在縣東南崛起海中周圍五
十餘里上有田地腴沃盛產荷花又博袍之山有
博袍水西流入海經此洲南○卯洲在西南海中
舊經云鳥多伏卵于上船過或取卵其鳥千萬飛
隨十里始返○寇萊公司戶叅軍其所居內有小
池忽一夕星隕于中使人入求之得一石因架軒
池上名瑞星池又有泉在西館內以萊公嘗喜飲
之因名萊泉○唐叟字元老桂林興安人紹聖間
爲海康令蘇子瞻南遷過之相得甚懽將渡海謂
曰元老行雖孤高唐氏豈容無後時叟年已五十

猶未娶云

遂溪縣

在府北一百里

古有鐵把縣因鐵把水為名又有樵縣隋改樵川唐天寶元年改鐵把為遂溪省樵川入焉宋初併入海康縣紹興二年復置○舊縣東五里峯崙埠有石枕海岸長五尺闊三尺宋嘉定間大雷雨龍降其地爪痕入石如鑿有泉湧出旋為潭○今縣英靈下村有石牛南朝時客陳姓者驅牛過此土地堂前牛悉化為石石皆半為牛頭客因家于此即雷種之祖地也○烏蛇山在縣東距三十里又

一百二十里有調樓山枕海高十丈絕頂有五色光現若樓臺故名○斜離嶺在縣南五十里高十仞突起二峰勢皆斜列又六十里有七星嶺嶺上起小七峰如北斗故名○湖光巖在縣東南七十里一名陷湖一名淨湖宋建炎中丞相李綱自萬安召還雷州時改今名相傳隋開皇中有白牛入村居民殺而食之惟一老嫗不食明日風雨大作一村盡陷成湖獨此嫗携一傘竹行至湖岸以竹倒插于地而去湖有二石巖如屋後人接蓋飛簷建佛殿其中餘巖皆可列坐巖北有神祠禱雨者

祀以白牛卽應宋封靈惠侯湖西絕壁中又有白雲巖宛若城門其前湖水澄徹人跡罕至唐宋末避世者多往依之靖康中有僧琮改爲禪菴琮本邑人超然拔俗足跡不到城市聞李忠定以謫官至杖錫來謁時官僚欲見之已飄然而去巖之陽卽鐵耙溪溪石有如鐵耙故名李綱贈僧琮詩萬里謫居來海嶠眼中衲子見絕少方袍圓頂動成羣與俗不同秣其表琮師乃是雷陽人徧歷叢林叅學飽歸來卜築瘴海濱十里湖光巖洞小深居不復卽城市宴坐惟知侶猿鳥惠然顧我意良勤

野鶴孤雲自輕矯風姿已舍蔬筍氣語論不將藤葛繞黃茅深處見篁筠使我困箱欲傾倒爲君聊復戀幽棲訪舊終須乘漭渺口公北還琮復追送至縣南城月驛公留別琮絕句云好任湖巖攝此心有緣終會有知音梁谿老去孤峯頂月白風清難更尋○螺岡山在縣西南七十里高三十仞多產橄欖南方草木狀名欖椶樹身聳拔高數丈許其子深秋方熟味雖苦澁咀之芬馥勝含雞骨香黃山谷詠橄欖詩想其餘甘有瓜葛苦中真味晚方回蘇東坡詩待得餘甘回齒頰已輸崖蜜十分

唐書卷之八
甜故又名餘甘子孫吳時歲貢至晉猶然山下爲
武樂水流向南轉東入海○澗洲在縣西南二百
里海中周圍七十餘里內有八村人多田少皆以
賈海爲生洲上有溫泉黑泥可浣衣使白如雪前
爲蛇洋洲周圍四十里二洲之上各有山阜縹緲
煙波間可望不可登又有調鷄門周圍一百五里
隔硎洲僅一港地勢奔趨如鷄展翅故名○海康
北至遂溪爲舖十其七日遂康康與遂接壤處也
又次爲賓畔舖宋運使梁安世過此有詩云榕枝
已斷根垂地竹箐相連路接溪風暖雷陽三月暮

木綿花落鷓鴣啼

徐聞縣

在府城南
一百里

漢志合浦郡有徐聞縣齊改齊康隋改隋康唐貞
觀二年復名徐聞宋開寶初併入海康縣紹興中
復置元至元中遷治賓村村卽今所按徐聞者以
海潮之來徐徐而聞也交州記云徐聞縣多大蜈
蚣其皮可昂鼓取其肉曝爲脯又云長數丈能噉
牛葛洪遐觀賦云蜈蚣大者長百步頭如車箱可
畏惡越人獵之肉如麪○石門山在縣西北五里
高十餘丈周圍十里上有巨石恠立如門山巔有

潭潭水四時不竭又四十里有廉賓水源出馬鞍山流至老沙港入海○石馬井在縣東五里相傳昔有馬常夜食人禾爲人追急入此井只留石形似馬故名今有碑刻石馬之神四字又十里有大水溪源出籠床山至此有石潭水聲響急其深不測名曰龍潭南經海安城東入海○雙髻嶺在縣北五十里昔有游士題詩嶺上云年年常喚作丫頭何不梳裝出嫁休筆忽乾下澗取水有神續云只爲尋媒未曾得巖前空立萬餘秋○小蓬山在縣南海中前有三墩中墩有古樹甚恠下有龍王

廟廟前有穴名龍泉祈雨者于鹹水中取得淡水則雨立至由此渡海四百餘里乃至瓊州海隅有千步香葉似杜若而紅碧間雜佩之聞于數里故名海中有鷄子魚肉翅無鱗尾尖而長有風濤卽乘風飛于海上又有天牛魚方圓三尺眼大如斗在脾頭口在脇中露齒無唇兩肉角如臂兩翼長六尺尾長五尺其形如魚能上岸與牛鬪角軟還入水中堅則復出又有海鏡亦名海月廣人呼爲膏葉兩片合以成形殼甚瑩滑如雲母光內有小肉如蚌蛤腹中有蠃子甚小頭黃螯足具備蠃出

拾食蠨飽滿腹海鏡亦飽或迫以火蠨子即走出
離腹腸立斃或生剖之蠨子活在腹中逡巡亦斃
云

香葉外公春而珠翠間辦麻支則于幾里站
限而立至由洲對嶼四百餘里以全製成新調亦
風雨前育穴各諸泉而兩昔于烟水中更尋幾不

廣東名勝志卷之九

閩中曹學佺能始撰

廉州府

在省城南一千八百九十里

領一州二縣

漢元鼎六年置合浦郡故隋大業于此置合州矣
元和志云今州即合浦郡理吳孫權黃武七年更
名珠官郡水經注曰地不產穀民以採珠為生故
名南齊志云越州臨漳郡本合浦北界夷獠叢居
劉宋泰始中西江督護陳伯紹啓立為越州在今
府治東十里一名青牛城蓋當置州時見三青牛
圍之即其處置城故名隋大業三年既廢州為合



浦郡唐武德初仍罷郡爲越州按通志謂在府東北八十里蓬萊鄉城串俱存宋李光越州道中詩晚潮落盡水涓涓柳老秧齊過禁烟千里人家雞犬靜竹扉斜掩護蠶眠○唐書貞觀八年改越州爲廉州取大廉洞而名其治亦在蓬萊鄉距越州城五里宋朝會要云開寶五年移廉州治于長沙場太平興國八年廢州而置太平軍于海門鎮去今治西南三十五里咸平元年復爲廉州始移今所在廉江東岸○天文志曰星紀鶉尾實負南海鶉尾楚分其星爲翼軫廉僻在遠裔踰邕潯而間

于楚惟鶉尾合浦足以當之○志云東漢犍爲費貽爲合浦太守涖政清簡民懷其德合浦江山皆名廉者以貽之故也○孟嘗浙江上虞人爲合浦太守先是二千石使民采珠積以自入忽徙去他境嘗痛易前弊化行踰歲去珠復還後人立還珠亭以表之○唐顏游泰瑯琊臨川人武德初廉州刺史時劉黑闥初平人多暴梗游泰至撫卹境內禮讓大行民歌之曰廉州顏有道性行同莊老愛人如赤子不殺非時草高祖璽書慰勞之○毛炳廣西富川人性倜儻不羈好讀書唐乾通際以平

寇功陞廉州都巡簡使交寇死于難累贈太尉忠
武烈公今有祠如其額○蘇緘福建晉江人宋神
宗時知廉州府吏多侵墨緘獨勵以清操人皆向
化改知英州儂智高作亂募士赴敵死之○李時
亮廣西博白人知廉州有治聲獻平邊十策及疏
時政神宗嘉之時亮精于詩與陶弼相賡和有李
陶集弼蓋知欽州云○陳瓘字瑩中南劍州人徽
宗朝論章蔡邪佞貶袁州又移廉州瓘在貶所自
署其齋曰了齋觀經史百家之言善者錄之于壁
既而合爲一書名曰壁記○蘇軾眉山入紹聖間

貶瓊州昌化縣安置元符召還量移廉州時有石
康令歐陽闢者與子瞻甚殷勤送接籬巾琴枕軾
以詩謝之因歎曰君年六十予尚少一歲白髮盈
頭正畧相似然君吏隱一隅視予困窮亦不相遠
矣○文忠公集有云合浦愈上人以詩名嶺外將
訪道南嶽留詩壁上云閒伴孤雲自在飛東坡居
士過其精舍因戲和之詩曰孤雲出岫豈求伴錫
杖凌空自要飛爲問庭松尚西指不知玄奘幾時
歸

合浦縣

附郭

漢舊縣宋開寶間省封山蔡龍大廉三縣入焉太平興國八年省入石康縣咸平元年復置我明成化八年以石康縣殘破于流賊仍省入○按封山縣故址在舊州南一百二十里南齊置封山郡隋罷郡爲縣唐于縣置姜州其屬有東羅縣尋皆併入○蔡龍縣在舊州北一百五十里唐初置卽今蔡龍洞也洞在今城東一里又有高城縣貞觀中併入蔡龍者旋俱廢○舊州東南一百里有大廉縣故址亦置于唐初後併入石康縣石康縣故址在府治東三十里○志云鴈池在治北二里環遶

芳洲其氣清淑常有鴈集故名又五里爲鍾灣水接江海相傳宋政和間靈覺寺鍾一夕飛去旣明懸空而下猶濕居人言灣中每夜有鍾聲必與龍戰寺僧察之果然遂鑿去頂上龍角乃止其後灣中風起輒有一物大如車輪藍色湧出波中復沒○縣東二里爲南津水源出薛屋嶺西流遶城入于州江又三里爲劉公涌水○州江卽廉江也源出廣西大容山南至州江口分爲五曰州江曰王屋屯江曰白沙塘江曰大橋江曰新村江環流郡南入海明知府饒秉鑑詩長江來浩浩何事得廉

名自是源常潔因之流亦清浪浮雲影動波靜月
華明寄語滄浪客于茲好濯纓○思鄉水在治東
北五里源出思峒山流至武水江復回峒界內入
晏江以其去而復還故名○猛水江在治北十里
自廉江分流者又十里爲石灣江以其灣際多石
故名○縣東十里登高山之陽有銅船湖劉欣期
交州記云湖去合浦四十里每陰雨輒見有銅船
出水又有一牛在湖中漁者祭以雞酒便得大魚
不然但得牛糞而已或以漢馬援嘗鑄五銅船以
其四渡海征林邑留其一于此云又十里有白石

山已入廢石康界內蘇子瞻詩青山南白石北此
地巉峨人不識者也又十里有三山三峰峭立與
白石山相接○龍門嶺在縣東十里其水分二支
曰源頭曰龍門環城北入欽州之龍門江又五十
里有仙人橋溪中突起一石儼若巨舟長四丈濶
半之南岸數石相聯北岸石條橫架于上有巨人
跡纍纍然橋南兩石人夾侍西有廢址如城池之
狀過東又一石橋橋橫小溪橋頭有石佛石盤俗
傳仙人撐石船引大廉小港北通石康至此聞雞
鳴乃止一名石雞橋又五十里有大廉山其上有

洞卽大廉洞也○交州記云合浦東百里有杉樹
葉落隨風入洛陽城漢時有廉盛說是休徵當出
王者特遣人伐樹北朝庾信詩云傳聞合浦葉遠
向洛陽飛薛道衡詩杉葉朝飛向京洛文魚夜過
歷吳洲○夫人山在縣治東糠頭山在治西北各
一百二三十里相傳秦尉佗嘗駐兵于此山之糧
以糠頭散給故名夫人者以劉宋時陳伯紹妻所
葬也○明月溪在治北八十里清夜湛然如月色
故名又縣東北八十里有張沐溪以晉時隱士張
沐居此○五黃嶺在縣北一百五十里相傳昔有

樵者入山迷路遇五黃冠朱顏相與談笑指示得
歸白鶴觀在其頂多產異果入山者得食不得懷
歸如懷一果卽迷歸路○武利江發源一自小雙
山一自張蒙山一自謝成嶺會武利埠南流至新
倉江入海○珠母海在縣南八十里中有七珠池
曰青鶯曰楊梅曰烏坭曰白沙曰平江曰斷望曰
海渚古今注云漢章帝時鬱林進大珠圍三寸和
帝時得大珠圍五寸徑七分南越志珠有九品大
五分以上至一寸八分分爲八品有光彩一邊水
平似覆金者名璫珠其次爲走珠又次爲滑珠又

次爲礪砢珠又次爲官兩珠又次爲稅珠又次爲
苾符珠菽園雜記云蛋人採珠者以大船環池以
石懸大絙別以小繩繫諸蛋腰沒水拾蚌置竹籃
中振繩則舶人汲取蛋緣大絙上不幸遇惡魚有
一線之血浮水面則已葬魚腹矣南史晉咸安元
年合浦人董宗之採珠沒水底得佛光燄先時咸
和中丹陽尹高悝舟行見張侯橋浦中五色光起
乃令人于光處得金阿育王像但無趺與光燄經
一歲臨海漁人張係世于海口忽見銅花浮出取
送縣縣送臺施之像足宛然會合至是燄光送臺

亦合像便放光照燭殿宇日久不散云○漢順帝
却獻珠詔曰海內頗有災異朝廷脩政大官減膳
珍玩不御而桂陽太守文龔不維竭忠宣暢本朝
而遠獻大珠以求媚朕甚不取焉令封以還之○
晉交州刺史陶璜請弛採珠禁表云合浦郡土地
磽确百姓惟以採珠爲業商賈去來以珠貨米而
吳時珠禁甚嚴禁絕道路人以饑困又所謂取繁
多不克今請上珠輸一次者輸二麤者悉蠲除自
十月訖二月非採珠之期聽商賈通行如舊詔從
之

欽州 在府西百四十里

領縣一

劉宋析合浦縣地置宋壽宋廣安京三郡梁置安州以統之隋開皇十八年改爲欽州 明洪武二年陞府九年改縣十四年仍爲州○志云三山嶺在州南五里有三山亭宋州守陶弼題十二韻刻石尚存上產孔雀又名孔雀嶺孔雀之雄者生三年有小尾五年成大尾自喜其尾而甚妬凡欲棲必先擇可置尾之處然後止捕之者候甚雨時其尾濡濕不能高翔又恐人傷其尾亦不敢翔也按唐宋欽州寧越郡貢翠羽本朝始罷○雙角嶺在

州北十里雙峰並峙如角故名又十里爲望海嶺言可以望海也又十里爲石浪山羣峰疊石如湧浪然○欽江在州治東源發洪崖山流經城東南以入于海而州西二十里漁洪江又十里鳳凰江州東二十里平銀江州南一百餘里防城江俱注之唐沈佺期渡海安詩嘗聞交趾郡南與貫胸連四氣分寒少三光置日偏尉佗曾馭國翁仲久遊泉邑屋遺氓在魚鹽舊產傳楚人遙捧翟漢將下看鳶北斗崇山掛南風漲海牽別離頻步月容鬢驟催年昆弟推由命妻孥割竹緣夢來魂尚擾愁

委病空纏虛道崩城淚明心不應天○龍門江在
 州南六十里源出合浦龍門山至此兩崖夾峙形
 勢若門而水深百尋大魚登此即化成龍不得過
 者曝腮點額血流入水恒如丹池流經涌淪周墩
 而達交趾蓋欽州要害地也龍門之前旁有巨石
 淡水出焉是名淡水灣○分茅嶺在州西南二百
 里與交趾分界山頂生茅南北異向漢馬援既平
 交趾立銅柱其下以表漢界唐安南都護馬摠亦
 建二銅柱于漢故處以明伏波之裔 明宣德二
 年地陷交趾嘉靖二十一年莫登庸降仍歸版籍

唐杜甫詩回首扶桑銅柱標冥冥氛氣未全銷越
 裳翠羽無消息南海明珠久寂寥殊錫曾為大司
 馬總戎皆插侍中貂炎風朔雪天王地只在忠良
 翊聖朝項斯詩領得賣珠錢還歸銅柱邊看兒調
 小象打鼓試新船醉後眠神樹耕時語瘴煙不逢
 寒便老相問莫知年○唐嗣聖間舍人張說流欽
 州有在嶺外送使詩秋鴈逢春返流人何日歸將
 予去國淚灑子入鄉衣饑餒啼相聚愁猿喘更飛
 南中不可問書此示京畿○宋大觀中魏安行為
 京西轉運副使以程瑀所著論解安行為之鏤板

秦檜疑其議也。因譖之流欽州編管。○呂祖泰字泰然，河南人。上書論韓侂胄無君，請誅之。書出中外，大駭。有旨配欽州牢城。收管既至，府官爲好語誘之曰：「此舉當有導汝者，幸試言之。」吾且署汝祖泰笑曰：「公何問之愚也。吾固知必死而可受教于人者乎？」尹曰：「汝病狂喪心耶？」祖泰曰：「今之附韓氏得美官者，乃病狂喪心耳。後侂胄誅，特授迪功郎監南岳廟。卒。○陶弼，永州人，以慶曆中知欽州葺城浚濠，郡治增固，政暇多所題詠。有吟石釣石東西兩湖皆所倘佯也。其題吟石詩云：『守邊無一事』

江上得閒吟，醉嚙歌微出，狂書墨不深。潮痕沒高岸，月色透疎林。此意無人解，宵分淚滿襟。釣石詩云：『守邊無一事，坐釣石東橋。樹色連山疊，泥痕上海潮。餌經河日煖，輪任水風飄。客正思新鱸，鯨鱖氣漫驕。』東湖詩：『寧越佳山水，東湖帶郡城。月天高寺影，春雨一橋聲。石上青蒲合，沙中白鳥橫。天涯正寥落，獨往若爲情。』西湖詩：『寧越佳山水，西湖似浙城。桂多天竺子，潮次海門聲。路向林梢轉，橋隨野色橫。從茲棲泊者，無復渡江情。』商翁又題州東門之天涯亭，霧雨絲絲風色驕。天涯亭上覺魂銷。

一家生意付秋瘴萬里歸心隨暮潮兵送遠人還
海界吏申遷客入津橋山公對此聊酣飲怕見醒
來兩鬢凋

靈山縣

在州北百二十里

隋置南賓縣屬欽州唐貞觀中改名靈山宋開寶
中廢遵化欽江內亭三縣入焉遵化故址在今縣
治南三十里卽李邕貶遵化尉處欽江故址在今
縣西南內亭故址在今縣治西九十里先是州治
在欽江至天聖初徙治今縣西八十里元又徙治
安遠以靈山爲屬○靈山在縣西一里又名石六

峰其峰有六雄壯竒特內一峰曰龜峰龜靈物也
故曰靈山因以名縣其下有巖純石而內虛高廣
如堂室石乳森森下垂滴如纓絡巖有三曰龜巖
月巖錢巖宋州守陶弼登此有記畧云予得三巖
于榛莽間其一呀然雲際天光內通如月半破一
似巨龜殼側倚巖下一窪中隆前卑後昂狀如覆
鼎上有陰壑刀布藏焉樵者百方力不能到下有
磐石螺蚌附之疑古海漸于此因名三海巖又有
無名氏碑記云刀布懸巖非人力取螺帶石磯蚌
凝斗壁天柱撐空流源匝地金獅玉象連綿地鼓

石鐘相應觀音變化之像巍然在湧壁間平地突起尖峰深巖直通海底峰頂有碧塘生錦鯉人常見之然不可取明翁傳詩靈巖窅空洞竒探迥且深五月微風生飄飄涼氣侵石牀夔閒靜獨坐彈素琴徘徊理中曲惜哉無知音日暮登高岡遠望浮雲陰欲因南風發送此萬里心○龍牙山在縣北十五里山中澄潭常有龍起故名又三十里有洪牙山一名洪崖與廣西橫州接界下爲洪崖江經縣西流入于欽○黃樓山在縣西北十五里本名黃姜山唐時山下有黃氏女招遵化姜神羽爲

婿築樓以居之因名○羅陽山在縣東一十五里山極高大陟其巔往返盡二日力山上巨石方丈旁有脩竹風搖則掃其石上塵謂之神帝山峙縣東日出必先照故曰羅陽其西有穿鏡巖與三海巖相接翠屏聳立峰半一竅相通望若城門天日臨之眇如穿鏡○狼濟山在縣西一百里山上有石室石門門外橫一石橋橋上石人夾立初唐州人甯原悌讀書于此舉永昌元年進士累官諫議大夫兼修國史以直書隱巢事忤玄宗旨去官原悌曾孫越郎亦嘗于此游獵今有石名狗跡者其

所憇處宋之問于宋公宅送審諫議詩宋公爰創
 宅庾氏更誅茅間出人三秀平臨海四郊漢臣來
 絳節荆牧動金鏡樽溢宜城酒笙裁曲沃匏露荷
 秋變節風柳夕鳴梢一散陽臺雨方隨月兔巢按
 延清以神龍二年徙知欽州云○大洸江在縣南
 一百六十里源出高崙嶺西南流抵大洸港入海
 唐白樂天送客遊嶺南詩已訝遊何遠仍嗟別太
 頻離容君感促贈語我殷勤迢遞天南面蒼茫海
 北濬譚陵國分界交趾郡為鄰翦鬱三光晦温暾
 四氣勻陰晴變寒暑昏曉錯星辰瘴地難為老蠻

陬不易馴土民稀白首洞主盡黃巾戰艦猶驚浪
 戎車未息塵紅旗圍卉服紫綬裹文身麵苦枕椰
 裏漿酸橄欖新牙檣迎海舶銅鼓賽江神不凍貪
 泉暖無霜毒草春雲烟蟒蛇氣刀劍鱷魚鱗路足
 羈棲客官多謫逐臣天黃生颶母雨黑長楓人廻
 使先傳語征車早返輪須防杯裏蠱莫愛囊中珍
 止與南殊俗身將貨孰親嘗聞君子誠憂道不憂
 貧

廣東名勝志卷之九 終

泉剗無露毒草春雲剛靄棟床仄險豔魚鱗祖以
莫葉翎嫵懣諒平懣豈或能隨遊賽玉輒不寒食
共車未息聖孫賦圍洵淵紫絲界文良酸苦林懣
測不息颯土刃赫白首歐主盡黃巾輝灑懣驚

廣東名勝志卷之十

閩中曹學佺能始撰

瓊州府

在海南渡海不計里數

領州三縣十

山海經離耳雕題二國皆在鬱水南楚離騷所謂
玄國之南裔也史記漢武帝平南越遣軍往漲海
洲上略得之始置珠崖儋耳二郡從徐聞縣對渡
北軍舉帆一日一夜而至自武帝至昭帝凡六叛
遂罷儋耳并屬珠崖元帝時珠崖又叛初元三年
復罷珠崖孫吳于徐聞縣立珠崖郡而于其地立
珠官一縣招撫遠人竟不從化晉宋志皆有珠官

南齊佚之梁又于徐聞縣立珠崖郡然皆不能有
其地也隋大業六年始開置珠崖郡立十縣又置
儋耳臨振二郡王象之曰此據元和志云耳而隋
志所不載又高州誠敬夫人廟碑云高祖賜夫人
臨振縣湯沐邑則是煬帝未置珠崖時已有臨振
縣矣然或先爲縣後置崖郡乎唐立都督府管崖
儋振三州貞觀五年以崖州之瓊山置瓊州城垣
治址已定廨宇初豎一夕梁飛于今所遂移治焉
卽今衛基是也貞元五年陞瓊州爲都督府儋崖
振萬四州俱隸瓊元改瓊州路 大明陞爲府○

攷志漢珠崖郡唐崖州俱在今治東南珠崖郡在
石陵村城址俱存有珠崖侯王廟今合祀靈山者
崖州在麻釵都其城濱江引小溪爲濠俗名舊州
是也○瓊臺在府治前唐設都督府宋置瓊管安
撫都監俱在此處○元泰不華送瓊州萬戶入京
海氣昏昏接蜃樓颶風吹浪蹴天浮旌旗晝捲蕉
花落弓劍朝懸瘴雨收曾把烏號悲絕域却乘赤
撥上神州男兒墜地四方志須及生封萬戶侯虞
集寄海南故將軍海上風來五月秋晚涼應上木
蘭舟金盤赤荔生南國玉盃清水出北州狂客醉

歸花作幃美人歌罷月如鈎期門舊識將軍面從
獵還披翠羽裘明楊士奇送黃知府之瓊州蕭蕭
朔風勁慄慄年歲徂積雪橫山岡凝冰塞川途念
子萬里行相送城南隅寒樹渺蒼茫誰能忍離居
離居昔不淺晤語今還促郡府分南漢蒸黎望賢
牧寒暉動飛旆浮埃暗馳轂遠舉凌冥冥臨岐羨
鴻鵠鴻鵠翔翩翩倏忽天之涯丈夫抱奇才致用
貴及時山川歷緬邈何以贈垂離永矢冰雪操遲
暮以爲期

瓊山縣

附郭

漢瑋瑁縣唐貞觀五年分置瓊山縣旋于縣立瓊
州十三年又析置曾口顏羅容瓊三縣後俱省宋
熙寧四年又省崖州之舍城縣入焉按梁置崖州
在今府城東南三十里而舍城縣隋置也在今府
城東北二百六十里顏羅一曰顏盧唐改顏城其
產有三熟之稻八登之蠶卽此曾口詳澄邁縣下
明知縣李思廸瓊山官舍夜雨作一片陰雲接海
潮晚風吹作雨瀟瀟燭花影裏人憔悴簷溜聲中
夜寂寥且喜暫時消瘴癘莫驚四序失和調救民
無策歸無計腸斷家山萬里遙○永日軒在兵備

道後爲唐相李德裕建舊傳公草窮愁志自序云
消此永日可以解憂後人因扁其居以寄想焉○
放生池在城南譙樓下宋守韓璧鑿建池上有六
瑞堂郡守王光祖建以其時蓮開並蒂者三云又
有知樂亭朱晦翁記○開元寺卽古乾亨寺也在
南橋內寺有東坡臺宋蘇軾謫昌化嘗寓其間○
霜筠軒在城之南 國初儒士王惠築以讀書解
縉爲之記○鴈塔峰在治南平岡一峰突秀如筆
水環其下元范惇題云自出瓊山古郭門更無平
衍似中原重重葉暗枕椰雨知是黎人第幾村○

雙泉在治北蘇軾有洞酌亭詩并引云軾南遷過
瓊得雙泉于城之東北隅泉相去咫尺而異味庚
辰歲遷合浦復過之太守陸公建亭泉上求亭名
與詩名之曰洞酌詩曰酌彼兩泉挹彼注茲一併
之中有澗有溜以淪以烹衆咸莫濟自江徂海浩
然無私○竹軒在城西成化中處士唐瑜就其所
居之東而建○下田村在縣西北一里大學士丘
濬世居于此城西澗有水環遶此村入海謂之第
一水文莊公有詩云玄圃麟洲非遠境延康龍漢
未多年有人問我家居處朱橘金花滿下田○蒼

屹山在城南二里洗馬橋南石峰屹立蒼翠撲人
壁間刻云盤龍屈曲自何起伏等字○又八里爲
南渡江源自五指歷臨高澄邁定安三縣界會諸
水至此入海越十五里有靈山自北渡海者至中
洋卽見此山上有靈山神祠每歲以三月九日有
司致祭又十五里爲滿渭溪水源有二一自謝潭
一自廕潭合流十餘里入大江鄉人沿溪築柵置
車升水灌田其水如渭之清而鄉語呼水爲滿故
名又五里有南湖通南渡江入海傍有石井上刻
詩云山高水碧半巖泉水接桃花亦洞天佚其二

旬○海口港在城北十里舟行順風一日夜可抵
徐聞港中產物曰吊介之屬也蛇頭鼉身水宿木
栖其膏甚輕利貯以銅瓦皆浸出惟雞卵盛之不
漏治諸腫毒又有蛤之屬曰蒯其腹有小蟹如榆
莢蒯開甲食則蟹亦出食蒯甲合蟹亦還○峻靈
潭在縣城東周圍二百餘丈出鱸魚色白而短大
者長二尺作膾炙殊香美又三里爲黎母水蓋黎
母山之水五派流入四郡故儋州亦有黎母水云
○潭龍嶺在東北二十里絕頂可望黎母諸山其
下有泉分兩臂並趨西南一泉中湧名曰卓錫相

傳宋僧和靖嘗卓錫于此蘇軾詩云少年好遠遊
蕩志隘八荒九夷爲藩維四海環我堂稍喜海南
州自古無戰場竒峰望黎母何異嵩與邛飛泉瀉
萬仞舞鶴雙低昂芋魁儻可飽無肉亦奚傷○玉
龍泉在城西南二十里郡人鄭廷鵠記略云郡城
之西南有泉出自石竇寒冽異常其味甘潔噴湧
之勢如飛珠走玉雖大旱不竭好事者因琢石龍
置竇中遂有今名白泉東流十步右轉而爲篁溪
過篁溪又十步乃滙而爲石湖湖水東流經學前
爲學前水正統八年有鴈來集丘濬記畧云正統

壬戌秋八月予肄業學宮童子報曰有鳥集于學
宮池比鰥鰥而小似鳧鷖而大足指蹼屬毛色蒼
白旁皇四顧馴擾不驚蓋平昔所未嘗見者盍觀
之予偕二友往焉顧謂之曰此易所謂鴻漸於陸
其羽可用爲儀者乎書所謂隨陽以爲居者乎是
集于江湖漢沔之間乃其所也嶺海之南隔山越
河胡爲而至此乎後二年甲子濬果首舉于鄉又
十年成進士入翰林累官少保武英殿大學士卒
謚文莊○西石山在城西四十里上多石下有洞
可容數百人其上有井與海通西南一里有漣蓮

洞自石門入其中逕竇委曲相通大小凡五峒上
有一門透露天日○惠通泉在城東五十里蘇子
瞻記畧云三山菴之下出泉味類惠山泉僧惟德
以水餉且求名名之曰惠通以其與惠泉通也○
扶山在城東南五十里左有五嶺一曰從衍二曰
思峒三曰光螺四曰居磔五曰居林逖相擁護故
以扶名道家第二十四福地有陶公者于此脩煉
得道仙去又名陶公山其西有蒼巡峒峒門寬五
六尺斜入二十餘丈內有二井人汲其一牛飲其
一山下巨潭流合三十六曲水達于大江○又三

十里曰那射山居人以射獵爲生其陽爲銅鈹溪
溪中巨石形如銅鈹水注其中聲如雷旱聞之則
雨雨聞之則止山中有獸名麕角當額上戴科藤
一株三四條長可一尋獵者每見而不敢射又有
果然似獼猴以名自呼蒼黑羣行老者前少者後
得果食則先與老者獠人射之以其毛爲裘甚溫
異物志云交州以南有果然其體不過三尺而尾
長四尺餘反尾度身過其頭視鼻仍見兩孔仰面
其毛長柔細滑澤十餘皮可得一褥麗好溫暖○
雲露山在縣西南六十里有三潭俗名陷屋潭上

潭林木陰森人莫近之下潭有石如橄欖微竅可穿禱雨多應又六十里有南岐嶺中有大石盤圍一丈許上有小石扣之聲如鼓亦名石鼓嶺○瓊山在縣南六十里下有瓊山白石二村土石皆白如玉而潤故名種藷芋味特美藷有紅白甜三種孫真人千金方在山者名山藥芋即食貨志之蹲鴟也蘇東坡芋羹詩云香似龍涎仍齶白味如牛乳更全清莫將南海金齏膾輕比東坡玉糝羹○丘文莊有布衣友黃珏隱于東臯去縣東六十里珏性冲澹耽詩交接海內名流大學士李東陽贈

以詩云日日沙頭看鳥飛柴門剛枕釣魚磯鶴鳴驚見海出月客嘯不知風滿衣隣舍牆邊呼酒近故人天上寄書稀從今小隱須稱大新向長安市上歸

澄邁縣

在府城西六十里

漢有句中縣隋以其地置今縣以境內澄邁山為名縣南七十里曾家東隅唐貞觀中于此置曾口縣南漢時省來屬今名博羅村是也○按澄邁山在縣東十五里特起一峰若樹株又名獨株山○縣西通潮閣乃宋澄邁驛閣也蘇子瞻過此嘗憇

閣上有絕句二首倦客愁聞歸路遙眼前飛閣俯
長橋貪看白鷺橫秋浦不覺青林沒晚潮又餘生
欲老海南村帝遣巫陽招我魂杳杳天低鷓沒處
青山一髮是中原○萬歲岡在縣西十里上有石
如列屏號聖石天將雨則雲霧滂塞又西爲大勝
嶺漢馬援大破交趾女子徵側徵貳嶠南悉平因
撫定珠崖調立城郭置井邑屯兵故以大勝名○
搏龍潭在縣南十里源自沙吉村轉流經此激灘
成潭國朝景泰天順年間俱有龍起至大勝嶺
上升○縣南二十里有文裔山龍泉出其陽三峰

在其陰又南有鯉魚潭出異魚如鯉山穴泉湧瀦
而爲潭其水深碧流溢出逕新安江達瓊山之白
沙入海○新安江源自五指山經本縣達定安至
白沙入海○雲賓谷在縣西北三十里明天順間
邑人吳濬隱居于此丘文莊擬之鄭子真谷口李
愿盤谷焉張汝弼詩椰葉陰中鵲雙語定應有客
來何許山居深窈路透迤來客須煩迂杖屨主人
預出谷口迎坐石聽松久延佇嚶嚶好鳥求友聲
宛轉綢繆如我情欲絕未絕忽飛去馬蹄踏踏來
林垆主人迎笑客下馬喃喃不已話平生步入草

堂景幽絕草光如霧花如雪萋葉檳榔取次嘗海
錯山珍相間列深尊巨觥醉乾坤麗語新詞弄風
月人生會面能幾何昨朝綠鬢今成皤湖海故人
能念我山居寥落頻相過我于谷口萬松裏誅茅
更結迎賓窠

臨高縣

在府南二
百三十里

唐志武德五年分平昌縣置臨機縣開元元年更
名臨高○志云毘耶山一名高山在城西十里縣
名臨高以此元范德機記畧云邑西有山山頂有
獸狀似大蟲俚人呼爲毘耶故以名山邑之耆老

曰漢建武二年青州人王氏家于邑之南村有子
長名祈次名律與邑人王居傑獵于山倦憇石上
祈爲石所陷居傑三引刀不解祈曰我爲毘耶大
神隱此石室已後可以純白三牲祀我語訖則神
人兩途律與居傑歸而謀之邑人如期致祭嗣是
神赫厥靈延祐甲寅邑宰某記曰夫渤海之五峰
蜀地之三峩竒則竒矣豈若此山之神魏榆之石
能言金華之石可叱惟則惟矣豈若此石之靈必
碑以絕之俾邑人不忘神之祀銘曰高山洪濛俯
視衆峰天造石室有神居中靈妙變化神機感通

英物呵護三邊息烽陽沴而和十雨九風民受乃
賜報彰神功歲有常祀犧牲致恭刻在金石以垂
無窮歲以八月十六日致祭新官到任必放雞神
前十其啼否以驗灾祥○美瀧灘在縣東十里水
白石巔瀉下高數十尋形如曳練下有潭其深莫
測久旱而響則雨灘上黑石平鋪可坐百餘人林
木桄榔最多其樹葉下有鬚如鹿馬尾採之以織
巾木性如竹紫黑色有文理堅可製器樹皮中有
屑如麵可爲餅食之○買愁村在縣南未詳其所
由名而村中多檳榔樹異物志云其樹若筍竹生

竿近上五六尺間洪腫起如塊木焉因折裂出如
黍稷無華而實大如桃李又棘針重累其下以衛
實蘇軾詠檳榔詩異味誰栽向海濱亭亭直幹亂
枝分開花樹杪翻青籜結子苞中皺錦紋可療饑
懷香自吐能消瘴癘煖如薰堆盤何物堪爲偶萋
葉清新捲翠雲胡銓買愁村詩北往常思聞喜縣
南來怕入買愁村區區萬里天涯路野草芳煙正
斷魂○縣東南三十里有那盆嶺勢自五指山北
來至縣界忽于平地突起一峰高聳而圓若覆盆
狀蜿蜒東北復起一二峰至府治又蜿蜒而西南

距縣城十里爲落雲嶺勢不甚高然將雨則雲先
棲泊于此○龍潭在縣西三十里潭側有廟元范
惇記畧云潭中有穴二水碧黑色測之無底宋天
聖間常有白龍出焉潭水西灌千餘畝大旱不殺
甚雨不涌或曰地近海穴通故然天久旱青白氣
上騰禱者以爲雨應延祐元年牛君那海來尹是
縣會旱禱之雨明年又旱余錄囚歷縣尹請述其
事刻諸石命吏剪叢翳來與龍約曰庶余文哉以
神視余吏反而雨隨至吁亦可謂靈矣乃爲樂龍
之章俾世世歌以承祀辭曰僊僊兮舞宇坎坎兮

拊鼓龍之居兮有宮棟白雲兮下爲宇湛湛兮天
門龍之徠兮從繽紛洞簫亮兮須君蹇須君兮日
復夜秣直蒸兮芳有藉折素馨兮楊柳玄天矯兮
上下○又十里有泉曰澹菴泉宋胡銓紹興十八
年謫吉陽軍過此遇旱覓得此泉甘而且冽由是
汲者不絕後里人戴定立石書澹菴泉三字○縣
治東有茉莉軒令謝渥建胡澹菴書扁云茉莉花
色白春末夏初盛開氣最清可以薰茗後人題詩
其上寄宿高軒忽十年幽香和墨染陶箋佳名舊
著松陵詠雅什新從海外傳三字尚蒙留紀錄一

生難遇好因緣寄聲茉莉花珍重莫受蠻風與瘴
煙蓋彼時秦檜憾銓輩書李胡趙三字于格天閣
上必欲殺之故其末句微寓意云

定安縣

在府城南
八十里

瓊山縣南境自漢至唐皆徠所居未嘗入版籍唐
咸通五年遣辛傳李趙四將軍提兵擒黎峒蔣璘
省等遂定其地置忠州兵還卽廢元至元三十年
元帥朱斌統兵深入人跡不到之處黎巢盡空明
年立定安縣于忠州故地天曆元年陞爲南建州
我 洪武初復爲縣○五指山在縣南界五峰屹

立如人指故名一云婺女星常降此山名黎婺山
一云昔雷攝一蛇卵在山中生一女歲久有交趾
蠻過海採香因與野合其後子孫衆多是爲黎人
之祖故曰黎母山黎人居山四傍內爲生黎外爲
熟黎始接州縣界大抵四郡各占隴之一隅而山
極高其巔常在雲霧中久晴海氛清廓時或見翠
尖浮半空下猶洪濛熟黎所居已阻且深生黎之
巢人跡不至相傳有怡真養氣壽考逸樂之輩不
與世接虎豹守險無路可攀但覺水泉甘美絕異
耳海槎餘錄云近聞熟黎村一壽婦嘗至山下有

淵泉極其旁皆果殼鳥羽盡中原之所有○方輿志云生黎各有峒主貝布爲衣兩幅前後爲裾長闊不過一尺掩不至膝兩腿俱露椎髻額前男文臂腿女文身而山中所產有沈香青桂香雞骨香馬蹄棧香同是一本其木頗類椿及檉柳葉似橘花白子若檳榔大如桑椹交州人謂之密香欲取者先斷其積年老根經歲皮幹朽爛而木心與枝節不壞者卽香也堅黑沈水者爲沈香細枝堅實不爛者爲青桂半沈半浮于水面者爲雞骨形如馬蹄者爲馬蹄粗者爲棧香○建江在縣北源自

五指山歷臨高出澄邁新江而來至此中有清潭潭有兩石似龜或擊折一頭江水爲赤數年又有五泥人卓立令賢則沙開泥人出否則淤隱不見右見大司空潘季馴記

文昌縣

在府城南百六十里

漢時置縣于治南紫貝山下亦以紫貝爲名在今新衙村唐武德五年改名平昌治今縣北何恭都及貞觀間又改今名元至順間遷北山都卽今治也○文昌江源有二一自龍塘山一自邁南山各流至城南一里相合又東南至清瀾港入海○玉

陽山在縣西北十里縣之主峰也林木椰子最多
大三四圍高二三文通身無枝至百餘年纔有葉
南方草木狀云三月花連着實房房三十或二十
七八子至六月熟七月收其大者可作椀○滑丘
在縣東北五十里東昆港水之北丘狹而長若埭
者延亘六七里內藏一丘隆然深秀宋知軍邢夢
璜世居于此其十代孫宥登明正統戊辰進士累
官僉都御史致仕歸作草亭于所居怡然終日○
又五十里爲銅鼓山晉書云諸獠皆鑄銅爲鼓初
成懸于庭中置酒以招同類豪富者以金銀釵扣
鼓遂遺主人若讎殺相攻便擊此鼓其類雲集後
人于此掘得銅鼓因以名山又二十里有抱虎山
山石如虎其左者回抱于右故名○魚爺井在縣
西五十里水極清冽相傳泉與海通有大魚白頭
俗呼魚爺卽出○東徭山在縣東一百里舊志云
此山之人形如猿徭其地多田種薯蕷給食紡緝
吉貝細密瑩白異物志云吉貝花熟時狀如鷺毳
中有實如珠珣細過絲棉人將用之則車輪絞出
其核但紡不織任意以抽相牽不斷○焚艘嶺在
治北一百三十里相傳漢樓船將軍楊僕初渡海

至此卽焚其艘船以示士卒必死要其滅賊後人因以名之又二十里爲七星山大海中連有七峰下出淡泉航海必于此取汲其木多相思大樹材理堅邪砍之則文可作器其實如珊瑚而稍異初色黃久則紅如豆歷年不變鳥多鷓鴣一名淘河身形似鷓而極大喙長尺餘直而廣額下垂如數斗囊若遇小水便柳水滿其額而去今水竭魚在陸地故曰淘河

會同縣

在府東南二百里九十里

元至元三十年與定安縣同置初治平定鄉皇慶

初王高之變徙端都爲今所○天塘溪在縣北二十里源出文昌天塘嶺流經達樂會萬泉江入海又有大塘水源出黎山分流縣南潞爲巨鍾曰大塘水○西崖嶺在治西三十里峰高千仞頂有巨石其色蒼白周迴望之形狀參差各異中有石龕幽邃可容數十人又縣東南隅二十里有多異嶺山多怪石異常故名

樂會縣

在府東南三百五十里

隋大業六年王萬昌作亂遣隴西太守韓洪討平之俄而萬昌弟仲通復叛洪又討平之師未返而

洪卒黎復叛有黎黑村爲黎出入之衝唐顯慶五年乃置縣于此以樂會爲名元至元二十四年徙太平鄉之調瀨三十一年徙萬泉渡北大德六年徙渡南爲今治○陰陽山在治北一里以山形奇偶相生也又十五里有龍見石狀如龍首山脊半里黑石峻嶒出若龍鱗而黎盆水繞其前○萬泉河在西北二十五里源自五指山流經定安黎峒東南達此至縣西分爲二支繞縣治至雷村山復合出博敖港入大海以其納衆水之流故名萬泉縣人牧馬皆飲于此又名飲馬河○三山神嶺在縣東南十里其上有泉名金牛井四時不涸禱雨多應又十五里有金牛山聳峻挿空登之則東南諸山皆爲培塿○白石山在縣西四十里峰高千仞頂有巨石其色蒼白形如礮碑周迴望之其形各異

儋州

在府西南三百七十里

漢有儋耳郡異物志云儋耳云者言土人鏤其頰皮上連耳斤分爲數支狀似雞腸累耳下垂或云馬援收黎人時見儋耳婦人號其地爲儋耳云今州西三十里高麻都有儋耳城遺址乃漢樓船將

軍楊僕所建唐平蕭銑置儋州始遷治城東卽今所也天寶元年改昌化郡乾元復爲儋州宋熙寧六年改昌化軍南渡廢軍爲宜倫縣明洪武初復爲儋州正統五年以宜倫併入唐巖維送李秘書往儋州魑魅曾爲伍蓬萊近拜郎臣心瞻北闕家事在南荒莎草山城小毛州海驛長玄成知必大寧是泛滄浪○淪水在州北一里源出黎母山合諸水來繞城北西流十里至新英浦與新昌渡水合流復經羊浦入于海唐貞觀中太子校書王義方貶儋州吉安丞行至海南舟人請以酒脯致


祭義方曰黍稷非馨義在明德乃酌水祝曰思帝鄉而北顧望海浦以南浮必也行愆諸已義負前脩長鯨擊水天乎覆舟因忠獲戾以孝見尤四維霧廓千里安流是時仲夏風濤蒸毒祭畢開霧遂南無恙○州西南有陷沿井郡國志云與淪水相通有人以竹置井口淪水得之俚人呼竹爲陷沿因以爲名或謂馬援乘白馬于此跑沙得泉一名白馬井○桄榔菴在城南蘇子瞻偃息之所傍有桄榔林菴南有清水池池中荷花四季不絕臘月猶盛東坡桄榔菴銘九州一區帝爲方輿神尻以

遊孰非吾居百柱負鼎萬瓦披敷上棟下宇不煩
兵夫海氛瘴霧吞吐吸呼蛟蛇魑魅出悠入娛習
若堂奧雜處童奴東坡居士強安四隅以動寓止
以實託虛放此四大還于一如知軍陳覺清水池
作秋來雨溢足池塘華屋臨流四面涼風颺圓荷
翻翠葢水涵芳蕙艷紅裝淡煙難掩天真色薄月
常籠自在香坡老未須譏瑣細解陪梅菊到冰霜
○載酒堂蘇東坡有詩并序云儋人黎子雲兄弟
居城東南偶與使君張中同訪之居臨大池水木
幽茂坐客欲爲釀錢作屋余欣然許之名其屋曰

載酒堂詩云退居有成言吾老竟未踐何曾淵明
歸屢作敬通免休閒等一味忘想生愧覩聊將自
知明稍積在家善城東兩黎子室邇人自遠呼我
釣其池人魚兩忘返使君亦命駕恨子林塘淺○
朝天宮亦在城東南中有息軒蘇長公寓此飲其
井而甘之因名乳泉井其詩云無事此靜坐一日
似兩日若活七十年便是百四十黃金幾時成白
髮日夜出開眼三十秋速如駒過隙是故東坡老
貴汝一念息時來登此軒目送過客席家山歸未
能題詩寄屋壁又乳泉賦吾謫居儋耳卜居城南

隣于司命之宮百井皆鹹而醪醴湮乳獨發于宮
 中給吾飲食酒茗之用益沛然而無窮吾嘗中夜
 而起挈餅而東有落日以相隨無一人而我同汲
 者不動夜氣方歸鏘瓊珮之落谷灑玉池之生肥
 吾一嚙而遄返懼守神之呵譏却五味而謝六塵
 悟一真而失百非雖飛仙之有藥中無主而何依
 渺松喬之安在猶想像于庶幾○相泉在州西十
 五里宋丞相趙鼎安置吉陽過此遇旱諸泉皆涸
 見瀕海有水脉令人鑿之得泉潮漲則鹹潮退則
 甘以其得之于丞相故名相泉○松林山在州北

二十里卽隋志之藤山也頂圓下垂其中如鱗中
 有石巖宋僧和靖居此餼松飲露面壁六年淳熙
 丙午功成騰化蘇軾松林山詩突兀隘空虛他山
 總不如君看道傍石盡是補天餘○龍門嶺在州
 西北三十里海岸夾起石峰兩趾奔海其狀若門
 可以泊舟上有石穴中虛通海透風名風門內容
 數十人昔有蛇潛其間化爲龍又名虺穴又四十
 里有黎毗山以近黎母而名○馬蝗山在州東三
 十里以形似得名相傳漢時屯兵于此土人時常
 掘得銅鼓鉦鎗等物其地又多鬼火以陰晴出沒



蓋古戰場血漬所化云

昌化縣

在州南二十里百九十里

漢有至來縣久廢隋大業初置昌化縣○昌江在城南十里源自五指山流納峩娘水至侯村分南北二派南江西流經赤坎村會海潮成港一名南崖江北江繞縣南流西至泥浦與潮相滙徑入海一名北海○峻靈山本名朝明在縣北十里郡國志云朝明山有二石如人相傳有兄弟向海捕魚化爲石號兄弟石又有石若冠帽乃二兄弟所遺及石池石船乃其所游乘者黎人祀之

嶺宋封其神爲峻靈王遂以名山宋蘇軾碑畧云唐代宗之世有比丘尼若夢恍惚見上帝賜八寶以獻諸朝且傳帝命曰中原兵久不解腥聞于天故以此寶鎮之以是知天亦分寶以鎮世也昌化縣西有山秀峙海上石峰巉然若巨人冠帽西南向而坐者俚人謂之山胎膊僞漢封其山神爲鎮海廣德王五代末南夷有望氣者謂是山有神寶氣艤舟其下斷山發石以求之夜半大風浪駕舟碎空中夷皆溺死儋之父老猶有及見敗舟山上者今獨有矴石存焉元封五年詔封山神爲峻靈

主山有石池產紫鱗魚民莫敢犯石峰之側有荔枝黃柑人得就食持去則有風霆之變銘曰瓊崖千里塊海中民夷錯居古相蒙方壺蓬萊此別宮峻靈獨立秀且雄為帝守寶甚嚴恭庇蔭嘉穀歲屢豐○碁子灣在縣西北二十里有石如碁子若取之者以紙錢拋山下取勿棟選取畢視之黑白適均○象石在縣城東十五里石形如象擊之聲如鉦又三十里有馬頰山勢起伏至海濱復相對聳起若天馬然○九峰山在城東一百六十里山有九峰盤旋百餘里其下為峩娘村相傳峩娘生

九子皆為酋長至九峒即此

萬州

在府城東南一百七十里

領縣一

唐志萬安縣下注云貞觀五年析文昌縣置龍朔二年于此置萬安州在今通化都名曰舊州天寶元年改萬全郡乾元復為萬安州大明洪武初改為萬州正統間以萬安縣併入○志云南陵水在縣西南二里又十里有大溪水二十里有都封水注之○金仙水在縣北二里發源黎山至城北瀦為潭流出平政橋轉北入小海潭畔有石盆上有馬蹄人跡及葫蘆痕相傳嘗有交趾道士煉丹

于此○東山嶺在縣東七里嶺南有巨石如盤又一石方如印一巖刻華封二字傍有丹井又南有維石巖泉出石壁下宋陳德裕守萬安劉椿爲作黎順亭記略云我公出守萬安大小峒穴隨土貢宜公減租寬役勸勉農桑遂令天生碑石聳然顯于東山華封巖側誠不偶出乃建黎順亭刻天然之碑四字○小海港在城東二十里產魚蝦味美港口二小石山峙起南北二門上有石神廟內有石船一石神三商舶往來祈福多應○赤隴山在州東南三十里其土色赤岡隴相連故名又二十

里海中有獨洲山風帆半日可到峰勢插天周圍五十里鳥有鸚鵡一種青色一種五色大于青而小于白又有鳥名秦吉了大似鸚鵡善效人言語音雄大分明于鸚鵡唐白居易詩云秦吉了出南中彩毛青黑花頸紅耳聰心慧舌端巧鳥語人言無不通又出猩猩郭璞讚云厥狀似獾號音若嬰自然知往頗測物情是也猩猩嗜酒好着屐能知人往事常數百爲群欲捕之者設酒路側織草爲屐更相連結猩猩見酒及屐知人設張則知張者祖先姓名乃呼名詈之奴欲張我乎捨之而去復

自再三相謂曰試共嘗酒但不醉何妨及飲遂至
于醉取屐著之因為人擒○六連山在縣北六十
里六峰連續起伏三十餘里故名鹿麋連聚于此
又名鹿市山○金牛嶺在縣東北一百里相傳嶺
上有金牛夜光舟人望見之以為寶氣○州北境
有岐峒蓋在生黎之外五指之中歷代不化者為
岐又為黎人所懼即隋志所謂龜岐也

陵水縣 在州城南
六十里

隋大業六年置陵水縣宋熙寧七年廢為鎮入高
寧縣元豐二年復置舊志及一統志云縣境

雲博遼二縣遺址皆唐貞觀中析文昌縣地置南
漢省入○多雲嶺在縣南十里一名靈山峻拔多
雲禱雨靈應又十五里有水口港源出大河水至
此合潮成港入海○陵楠水在縣東北十五里又
縣東二里有大河水二十里有博吉水源自五指
山繞石山間出合眾水至水口港入海○海中有
雙女嶼去岸半日周圍數十里兩石峙立如人上
有淡水海舶多就汲焉○小五指山在縣西南一
百里生岐峒中與崖州共界挺立數峯岐人環居
其下有郎温嶺嶺脚二峒外險而內夷乃陵水之




衝也

崖州 在府城南千四百一十里

古珠厓之別為崖州始于隋置臨振郡唐武德五年改為振州宋開寶五年改為崖州熙寧六年改為朱崖軍我 洪武二年復為崖州正統五年以寧遠縣併入○翰墨全書云崖州氣候不正春常苦旱涉夏多雨樵牧漁獵與黎僚錯雜出入必持弓矢丁謂之貶寇準初擬崖州忽自疑曰崖州再涉鯨波如何乃擬雷州按黎人居黎母山中崖州在隴南陲既不可取逕則復浮海循隴而南所謂

再涉鯨波也嶺表異錄云自瓊至振多溪澗澗中有石鱗次水流其間或相去二三尺近似天設可躡之而過或有乘牛過者牛皆促歛四蹄跳躍而過或失則隨流而下唐李德裕登臨振城詩獨立高樓望帝京鳥飛猶是一年程青山似欲留人住百匝千遭繞郡城宋丁謂崖州道中山木無陰驛路長海風吹熱透蕉裳渴思西漢金莖露困憶南朝石步廊江上綸竿輸散謔林間冠鷓負清涼下程欲選披襟處滿眼頰桐與佛桑○輿地紀勝云盛德堂在水南村宋裴聞義宅義本唐裴度十五



代孫父瑒爲雷州刺史以中原亂不得歸聞義由
蔭補知昌化軍十居于此會趙鼎編置吉陽義遂
讓宅以居後胡銓亦忤秦檜謫吉陽居之因題扁
且銘曰震風凌雨大厦幷幪遷客所廬丞相趙公
後來云誰廬陵胡銓三宿銜恩矧此八年○相公
亭在兢田村丁謂貶所郡長吏建屋數椽處之謂
嘗語客曰天下州郡孰大客曰京師謂曰不然宰
相爲崖州司戶則崖州大耳聞者絕倒○南山在
州南十里壁立枕海爲州屏障石邊一穴出泉清
冷可愛名萬仞泉明黃芳詩鵬背高騫吸曉虹却

憐孤絕自爲宗輿圖垂盡地千里峰勢半開波萬
重華夏封疆分徼外斗牛光焰直天中似嫌涓滴
分流細獨向重離閣會同○又十里爲釣臺山中
有試劍峰峰頭有石船長丈餘闊四尺有二石室
曰大小洞天宋知軍毛奎記畧云石船摩崖之巔
得一石室前瞰大海後環曲港峭壁在南小峒附
北又于山麓石峰之陰近石船得一巖由西北委
蛇數十丈以通後峒巖之外臨海有平石可坐而
釣是爲釣臺對巖之前巨石奇恠其下可坐十客
仰望諸景皆在目中○玳瑁欄在州東南五十里

海邊有巨石數十丈如屋宋時陳明甫鑿石爲欄以養玳瑁異物志云瑇瑁如龜大者如盤孟背上
有鱗發之因見其文有光輝可作器嶺表錄異云
生帶之遇有蠱毒則其甲自動搖每以爲驗唐末
盧亭獲以獻連帥薛知柔取二斤堵于左臂以辟
毒仍養于池俟其揭處漸生復送之海○落筆峒
在州東一百里石峰獨聳高數十丈中有石峒懸
石擊之如磬有石馬首在門內入門有雙石如懸
筆其尖水滴不斷東十數步復有一峒俯入僅容
身門內如屏高可十丈中甚暗外有石竅通光可

辯纖毫極處有井深不可測昔人刻木爲誌沈井
後乃于大海中得之知此井通海也○又三十里
爲臨川水源出黎山分爲兩派前後夾流臨川後
水產石蠃廣州記云只是常蠃以年久被水沫相
泡因成石每遇海潮卽飄出石蠃味鹹寒有毒王
消眼翳前水產海鏡嶺表錄異云廣人呼爲膏葉
兩片合以成形內有小肉如蚌蛤其殼圓中甚瑩
滑白照如雲母光○迴風嶺在州東北一百二十
里以颶風不過此嶺而名李德裕崖州道中嶺水
爭分路轉迷椰桄柳葉暗蠻溪愁衝霧毒逢蛇草

畏落沙蟲避燕泥五月畚田收火米三更津吏報
潮雞不堪腸斷思鄉處紅槿花開越鳥啼明張習
詩古驛投來近海堧坐看高嶺插青天明朝要向
迴風過便是蓬瀛頂上僊○大河水北流三里復
分流南入于海海槎餘錄云海面七百里外有石
塘北之海水特高八九尺海槎必遠避而行若一
墜卽不能出其南波流甚急舟入迴溜中罕能脫
者又有鬼哭灘凡舟至此輒有無頭及隻手獨足
短禿之鬼百千爲羣互來追逐舟人以米飯投之
則止○木飲川在州境西陽雜俎云朱崖有一島

居民甚衆而地無井海水特鹹取草木汁飲之故
名

感恩縣 在州西南三百二十里

漢九龍縣治九龍山下隋改今名宋入宜倫縣元
豐復置○感勞山在城北十里感恩之水出其陰
南有平坡昔大軍平黎至此秋毫無犯土人感而
勞之故名○南龍江源出黎母山東繞縣治西會
潮成港入海兩崖皆石深不可測又四十里有透
道巖澄江之水出焉一名白沙港其水澄澈源出
黎母山流經此會潮成港入海又五十里有抱透

巖巖在山巔口僅二尺許內闊如巨室黎人常藏穀帛于此七十里有虞山石鼓在古鎮州廢城之東河中鼓圓六尺以小石擊之聲如空甕傍五大石有異人鞞及馬蹄跡○黎虞山在縣東五十里黎人虞獵于此又百五十里有小黎母山勢自黎母而來至是聳起危峰逕路崎嶇人跡罕至羣黎環居其下○南湘江在縣南三十里源亦出黎母山至此西南入海天下之潮皆一日兩汛惟瓊海之潮半月東流半月西流潮之大小隨長短星不係日之盛衰李思迪觀海濤詩海風捲水海欲黑

翻天沃日高千尺馮夷起舞羣龍趨六鰲駕出雪山白洪流洶湧迷天關我行見之心膽寒須臾滿耳自澎湃萬鼓怒吼雷門間水晶樓閣白玉闕千尋萬疊不可越有客破浪乘長風使我因之壯心發

廣東名勝志卷之十 終



廣東名勝志 卷之一

日南府志

平海池... 石城... 容... 如... 泉... 乘... 壯... 風... 對... 芬... 田... 之... 環... 山... 其... 自... 幽... 雅... 高... 峻... 孤... 翠... 雲... 霞... 潤... 木... 晶... 對... 閣... 白... 毛... 關... 千... 山... 白... 雲... 流... 斷... 斷... 盡... 天... 關... 拜... 香... 良... 之... 心... 難... 寒... 處... 更... 崇... 清... 去... 天... 甘... 滿... 十... 具... 鼎... 伐... 味... 異... 香... 醇... 賦... 六... 雙... 龍... 出... 室...

